

"DAN pada hari itu didatangkan neraka jahanam. Pada hari itu barulah manusia ingat (sedar akan dosa-dosanya) tetapi ingatan (kesedaran) itu tidak berguna lagi kepadanya. Dia berkata :
 "Alangkah baiknya kalau aku (di dunia) dahulu menyediakan amalan-amalan baik untuk hidupku (di sini)".
 - Allah Subhanahu Wata'ala berfirman dalam Surah Al-Fajr, ayat 23-24.

Majlis Khatam Al-Quran raikan bakal graduan UNISSA



REKTOR UNISSA semasa hadir pada Majlis Khatam Al-Quran dan Doa Kesyukuran sempena Hafi Al-Takharruj Ke-13 yang berlangsung di Jame' 'Asr Hassanal Bolkihah (atas). Manakala gambar kanan, bakal graduan UNISSA yang diraikan pada majlis tersebut.

Oleh : Pg. Siti Redzaimi Pg. Haji Ahmad
 Foto: Mohamad Azmi Awang Damit



BANDAR SERI BEGAWAN, Khamis, 10 Ogos. - Seramai 471 bakal graduan Universiti Islam Sultan Sharif Ali (UNISSA) diraikan pada Majlis Khatam Al-Quran dan Doa Kesyukuran sempena Hafi Al-Takharruj Ke-13 yang berlangsung di Jame' 'Asr Hassanal Bolkihah, pagi tadi.
 Hadir selaku tetamu kehormat, Rektor UNISSA, Dr. Haji Norarfan bin Haji Zainal.

Majlis Khatam Al-Quran dimulakan dengan bacaan Surah Al-Fatihah yang dipimpin oleh tetamu kehormat dan kemudian diikuti dengan bacaan Surah Adh-Dhuha hingga Surah An-Nas oleh para bakal graduan UNISSA. Acara kemudian diikuti dengan bacaan Takhtim oleh mahasiswa UNISSA dan disudahi dengan bacaan Doa Khatam oleh graduan Program Sarjana Muda Ekonomi

dan Kewangan Islam, Awang Abdull Mu'in bin Haji Abd. Hamid. Laungan Dikir Marhaban turut menyerikan acara pada pagi itu dan bagi memberkati majlis, bacaan Doa Kesyukuran UNISSA dibacakan oleh graduan Program Sarjana Muda Usuluddin, Awang Md Nur Iqbal bin Awang Asli. Majlis seumpamanya adalah merupakan salah satu acara tradisi

tahunan yang diungkayahkan bagi menyemarakkan Sambutan Hafi Al-Takharruj UNISSA. Antara lain tujuan majlis diadakan ialah untuk membudayakan pembacaan Al-Quran dalam kalangan para mahasiswa dan mahasiswi selaras dengan hasrat negara untuk menjadikan Negara Brunei Darussalam sebagai negara zikir.

Di samping itu, ia adalah sebagai galakan penglibatan para mahasiswa dan mahasiswi dalam aktiviti keagamaan agar dijadikan sebagai amalan harian. Turut hadir bagi meraikan majlis tersebut ialah Penolong-penolong Rektor, Pegawai-pegawai Utama, Timbalan-timbalan Dekan / Pengarah serta ibu bapa dan penjaga graduan.